

Mintga instituziun duai decider sezza

L'organisaziun Palliativ Grischun che s'engascha per la tgira palliativa en il chantun Grischun na vul betg che las instituziuns d'attempads vegnian obligadas d'exequir il suicidi assistì en lur localitads. In'incumbensa ord il Cussegl grond percuter vul obligar las chasas da tgira da porscher questa pussaivladad.

MARTIN GABRIEL/FMR

Expligà la posiziun da Palliativ Grischun a chaschun d'ina conferenza da medias a Cuira han ils dus commembres da la suprastanza *Christian Ruch e Cristian Camartin* ensemble cun la gestiunaria *Monika Lorez-Meuli*. Il punct central da la posiziun: Els n'en betg d'accord, che chasas da tgira vegnian obligadas da possibiliter il suicidi assistì en lur localitads. Nagina persuna possia vegnir sfurzada da sostegnair in suicidi assistì. Quai valia surtut er per collavuraturas e collavuraturas en profesions medicinalas e da tgira. Bleras persunas dal persunal na veglian betg esser confruntadas cun assistenza da suicidi.

L'incumbensa politica va memia lunsch

L'incumbensa dal deputà socialdemocrat *Pascal Paijc* pretenda, che tut las chasas da tgira sostegnidals dal Chantun duain possibiliter il suicidi cun assistenza. Actualmain n'e quai betg garanti. Tut tenor ston las persunas che giavischian il suicidi assistì bandunar la chasa da tgira ed uschia er bandunar l'ambient ch'els enconuschan. Il deputà Paijc di, che quai cuntrafetschia als dretgs umans. La primavaira passada ha il parlament chantunal surdà cun gronda maioritat l'incumbensa a la Regenza.

Decisiun da mintga instituziun duai esser publica

Palliativ Grischun ha sin basa da l'intervenziun dal deputà Pascal Paijc reelavrà sia posiziun. Tenor quella duain las chasas da tgira sezzas decider, sch'ellas vulan porscher la pussaivladad da far en lur localitads in suicidi assistì. Sco quai che Christian Ruch ha ditg en la conferenza da medias dovrà ina tala decisiun ina ponderaziun approfondada. «Ina decisiun po pir crudar, sche l'instituziun è s'occupada fermamain cun las dumondas eticas da questa tematica. Nus refusain en mintga cas l'assistenza da suicidi en ospizis ed instituziuns spezialisadas sin tgira palliativa.» In'ulteriura pretensiun: Ina persuna che vul assistenza da suicidi duai vegn accumpagnada fermamain da persunas cun scolaziun medicinala. Uschia vul Palliativ Grischun garantir, che la decisiun da suicidi vegnia fatga ord atgna voluntad e cun plaina abilitad da giudigar. La decisiun co vinavant dat il Cussegl grond cun la revisiun da la lescha chantunala da sanadad.



Christian Ruch e Monika Lorez-Meuli han expligà la posiziun da Palliativ.gr.

FOTO OLIVIA AEBLI-ITEM

Tge è suicidi assistì?

Suicidi assistì (Sterbehilfe) prest'ins cun procurar per ina persuna che vul murir in medicament che maina a la mort. Suicidi assistì è per exempli quai che las duas organisaziuns Exit e Dignitas pratigeschan en Svizra. Il dretg penal svizzer scumonda questa metoda sulettamain, sch'il suicidi assistì vegn giavischà per motivs egoistics. Exit e Dignitas pratigeschan il suicidi assistì en cumbinaziun cun l'accampagnament da las persunas che vulan murir fin a la fin da lur vita. Tar il suicidi assistì tragutta la persuna che vul murir sezza la substansa mortala.

Tge è eutanasia activa?

L'eutanasia activa vegn era numnada suicidi activi. Quai è la suletta metoda ch'è scumandada en Svizra. Tar l'eutanasia activa vegn il medicament mortal dà cun in'infusiun a la persuna che giavischia da murir. En quest cas discurr'ins d'in mazzament e perquai è l'eutanasia activa scumandada.

Tge è eutanasia passiva?

Tar l'eutanasia passiva, era numnada suicidi passivi, vegni desistì da mesiras per prolongar la vita. Ubain ch'i vegn desistì u che questas mesiras da prolongaziun vegnan interrutas. In exempli per l'eutanasia passiva e d'interrumper il nutriment artifizial tar in pazient u ina pazienta ch'è muribund. In auter exempli è da renunziar ad ina operaziun.

«Nus pudain prender il mal, ma senza avair la mort sco finamira»

Cristian Camartin che fa part da la suprastanza da l'organisaziun Palliativ Grischun è dapi 10 onns medi directiv da la partizun palliativa en l'Ospital chantunal a Cuira. Per el èsi decisiv da pudair porscher a las pazientas ed als pazients la megliera qualitat da vita pussaivla enfin la fin. La FMR ha fatg trais dumondas a Cristian Camartin.

FMR: Vus avais ditg ch'i dettia alternativas al suicidi assistì. Tge alternativas fissan quai?

Cristian Camartin: La dumonda è daco che la pazienta u il pazient patescha. Nus pudain en la medischina palliativa per exempli prender il mal u las difficultads da respirar ed en il mender cas pudain nus dar in med che la pazienta u il pazient dorma e na sto betg patir. Nus na dain dentant betg in medicament che scursanescha la vita. Damai: La gronda differenza tranter quai che nus faschain ed il suicid assistì è, che nus pudain prender il mal, ma senza avair la mort sco finamira da la terapia.

Datti blers che giavischian in suicid assistì?

En l'Ospital chantunal capita quai fitg darar ch'insatgi giavischia in suicid assistì. Mia emprima dumonda a quella ni quel che giavischia quai è adina, sch'el saja commember d'ina organisaziun sco Exit u Dignitas. Sch'il pazient n'e betg commember, lura signifitga



Il medi directiv da palliative care a l'Ospital chantunal Cristian Camartin.

FOTO MARTIN GABRIEL

quai plitost in clom d'agid. Sch'ina persuna e dentant commembra dapi blers onns, lura è la situaziun sa chapescha in'autra. Aifer il 13 onns che la partizun palliativa a l'Ospital chantunal exista ha quai dà precis 12 cas ed 11 da quels eran commembres d'ina organisaziun d'accampagnament da suicidi.

Las instituziuns da tgira d'attempads vegnisan tenor la volontad dal Cussegl grond obligadas da procurar en lur localitads per il suicidi assistì. In nov burdi per quellas instituziuns che han uschiglio problems cun mancanza da persunal qualifitgà e da survegnir persunal insumma. Po quai ir bain?

Na, jau n'hai betg l'impressiun che quai fiss bun d'obligar las instituziuns d'exequir il suicidi assistì. Bleras e blers visassan probabla-main la plazza ed il sectur da tgira avess in nov problem. Igl n'e er betg chaussa da mintgin u mintgin da lavurar en ina instituziun che porscha il suicid assistì. Ed i na sa tracta betg sulettamain dal pertutgà, mabain er da la famiglia e dal conturn famigliar.